

Oleh Juwan Riduan  
am@hmetro.com.my

## Kota Kinabalu

**S**eorang inspektor dan empat anggota polis mengaku tidak bersalah atas pertuduhan menerima suapan keseluruhan sebanyak RM8,020 di Mahkamah Khas Rasuah di sini, semalam.

Kelima-lima tertuduh membuat pengakuan itu selepas pertuduhan dibacakan di hadapan Hakim Abu Bakar Manat.

Mengikut pertuduhan, mereka didakwa menerima suapan sebagai dorongan untuk tidak mengambil tindakan terhadap seorang lelaki yang ditahan mengikut Akta Dadah Berbahaya Langkah-Langkah Pencegahan Khas 1985.

Tertuduh pertama, Inspektor Joevian Gubal Michael, 41, yang bertugas di Bahagian Narkotik Ibu Pejabat Polis (IPD) Kota Belud berdepan empat pertuduhan menerima suapan sebanyak RM2,400.

Semua duit berkenaan dimasukkan ke dalam akaun bank miliknya antara 16 November 2016 hingga 17 Disember 2017.

Tertuduh kedua, Sarjan Azizul Ismail, 32, pula berdepan empat pertuduhan menerima suapan RM900.

Tertuduh yang turut bertugas di IPD Kota Belud menerima suapan yang dimasukkan ke dalam akaun bank miliknya antara 24 April 2017 hingga 30 Julai 2017.

Tertuduh ketiga, Lans Koperal Hairul Amid, 36, yang bertugas di Ibu Pejabat Polis Kontinjen (IPK) Sabah berdepan lima pertuduhan.

Tertuduh ketiga itu menerima suapan RM2,000 ke dalam akaun bank miliknya antara 11 Ogos 2017 hingga 9 Jun 2018.

# MAKAN SUAP RM8,020

*Inspektor, 4 anggota polis tak mengaku salah rasuah berkaitan tangkapan kes dadah*



SALAH seorang tertuduh (memakai topi) bersama peguamnya menguruskan ikat jamin di Mahkamah Khas Rasuah Kota Kinabalu, semalam.

Tertuduh keempat, Lans Koperal Afizul Azwan Anuar, 29, yang bertugas di IPD Kota Belud, berhadapan empat pertuduhan menerima suapan sebanyak RM470 antara 13 April 2017 hingga 6 Mei 2017.

Sementara, tertuduh terakhir, Koperal Abdullah Bakir, 44, yang juga bertugas di IPD Kota Belud berdepan 18 pertuduhan menerima suapan sebanyak RM2,250 antara 14 April 2014 hingga 1 Oktober 2015.

Mahkamah kemudian membenarkan Joevian dan Hairul dikat jamin dengan

wang jaminan RM10,000 bersama RM4,000 deposit.

Sementara, tertuduh kelima dibenarkan ikat jamin dengan nilai yang sama namun dengan RM5,000 deposit bersama seorang penjamin tempatan selain diminta untuk tidak mendekati saksi.

Tertuduh kedua iaitu Azizul dibenarkan ikat jamin dengan wang jaminan sebanyak RM8,000 dengan deposit RM4,000 manakala tertuduh keempat dibenarkan ikat

jamin dengan nilai sama namun dengan RM3,000 deposit

bersama seorang penjamin tempatan.

Hakim Abu Bakar kemudian mengarahkan semua tertuduh melaporkan diri sekali dalam dua bulan kepada Suruhanjaya Pencegahan Rasuah Malaysia (SPRM).

Selain itu, mereka turut diarahkan menyerahkan pasport masing-masing kepada mahkamah.

Mahkamah menetapkan sebutan semula kes kelima-lima tertuduh pada 24 November depan.

Kes pendakwaan dikendalikan Timbalan Pendakwa Raya SPRM Sabah, Nurul Izzati Sapifee manakala tertuduh diwakili peguam masing-masing.

**Mahkamah menetapkan sebutan semula kes kelima-lima tertuduh pada 24 November depan**